

## Evening Gojri News 31 October 2024 at 1700 Hrs

- \*1. وزیر اعظم نریندر مو دی نے کہیو ہے کہ جموں کشمیر غا لوکاں نے فیصلہ کُن ور علیحدگی پسندی تے دہشت گردی تیں منہ موڑ لیو ہے تے بجائے اسگے ہُن لوکاں نے اپنا ووٹ غی طاقت غے ذریعے جمہوریت نانہ مضبوط بنان مانہ توجو دتی ہے۔
- \*2. لیفٹنٹ گورنر منوج سنہا نے کہیو کہ جموں کشمیر کم از کم 1 لکھ کروڑ روپیاں غی سرمایہ کاری واسطے تیار ہے جس سنگ 5 لکھ روزگار غا موقعہ فراہم کرایا جائیگا۔
- \*3. قوم اج سردار ولہ بھائی پٹیل غا یوم پیدائش غا موقعہ ور قومی یکجہتی تہاڑو مناربی ہے۔

\*4. تے وزیر اعظم نریندر مو دی نے اج آپسی اتحاد غا جذبہ ور زور دتو تے مُلک غا لوکاں نانہ تقسیم کرن آلی طاقتاں غے خلاف خبردار کیو جن غو مقصد مُلک غی سالمیت نانہ توڑنو ہے۔

\*\*\*\*\*

خبران غی تفصیل نال پہلاں محمد سفیر۔

### PM JK

وزیر اعظم نریندر مو دی نے کہیو ہے کہ جموں کشمیر غا لوکاں نے فیصلہ کُن طور ور علیحدگی پسندی تے دہشت گردی تیں منہ موڑ لیو ہے بجائے اس غے ہُن لوکاں نے اپنا ووٹ غی طاقت غے ذریعے جمہوریت نانہ مضبوط بنان مانہ توجہ دتی۔ وزیر اعظم نے اس گل ور وی زور دتو جے جموں کشمیر مانہ 75 سال قبل بھارت غی آزادی تیں بعد پُر امن طور ور انتخابات ہوا ہیں۔ راشٹریہ ایکتا دیوس غا موقعہ ور قوم سنگ خطاب کرتاں واں وزیر اعظم نے کہیو کہ یوہ لمحو قابل فخر ہے کہ جموں کشمیر مانہ پہلی بار وزیر اعلیٰ نے بھارتی آئین غے تحت حلف چایو۔ یکجہتی تہاڑا گا موقعہ ور خطاب کرتاں واں وزیر اعظم نے کہیو کہ جموں کشمیر لوکاں نے آئین تے جمہوریت نانہ کامیابی دلوائی ہے۔ اس سلسلہ مانہ وزیر اعظم نے جموں غا ووٹراں غا جذبہ غو احترام کرتاں واں کہیو کہ راشٹریہ ایکتا دیوس غا موقعہ ور ہوں جموں کشمیر غا لوکاں نانہ سلام پیش کروں جنہاں نے جمہوریت تے آئین نانہ تقویت دتی ہے۔ انہاں نے کہیو کہ دہشت گرداں نانہ وی اس گل غی خبر ہے کہ اگر انہاں نے حملو کیو تاں انہاں نانہ بخشو نہیں جائے گا۔

\*\*\*\*\*

### LG JK Foundation Day

جموں کشمیر یوٹی غا یوم تاسیس منان گا سلسلہ مانہ ایس کے آئی سی سی سرینگر مانہ منعقدہ پروگرام مانہ لیفٹنٹ گورنر منوج سنہا نے خطاب کیو۔ اپنا خطاب مانہ انہاں نے لال چوک تے پلوامہ مانہ ترقیاتی کماں گو ذکر کیو اور کہیو جے جموں کشمیر کم از کم 1 لکھ کروڑ روپیاں غی سرمایہ کاری واسطے تیار ہے جس سنگ 5 لکھ لوکاں واسطے روزگار غا موقعہ فراہم کرایا جائیگا۔ اس موقعہ ور انہاں نے جموں کشمیر مانہ امن تے قانون برقرار رکھن مانہ پولیس تے دیگر غا کردار غی وی سراہنا کی۔ اور جموں کشمیر غا روشن مستقبل بنان واسطے انہاں نے یکجہتی برقرار رکھن تے رُل مل غے کم کرن ور زور دتو۔ یاد رہے جے جموں کشمیر گاریاستی درجہ غی بحالی بارے بولتاں واں انہاں نے کہیو جے وزیر اعظم نریندر مو دی تے وزیر داخلہ نے پہلاں وعدو کیو وی ہے جے ریاستی درجو مناسب وقت ور بحال کیو جائے گا۔ مذکورہ پروگرام غے علاوہ ایل جی موصوف نے راج بھون سرینگر مانہ افسران نانہ راشٹریہ ایکتا دیوس عہد وی کرایو۔ یاد رہے سردار ولہ بھائی پٹیل نانہ اُن غا جنم تہاڑا ور خراج عقیدت پیش کرتاں

وان عوام نانہہ تاکید کی جے وے سردار پٹیل غو نظریو اختیار کر غے اپنا آپ نانہہ وکست بھارت بنان غی خاطر وقف کریں۔ انہاں نے سوشل میڈیا ایکس ور وی پوسٹ کر غے سردار پٹیل نانہہ خراج عقیدت پیش کیو۔

\*\*\*\*\*

### Encounter Jk

جموں خطہ گا اکھنور مانہہ فوج تے دہشت گردان مابین ہوا ٹاکرا مانہہ ہلاک ہوا 3 دہشت گرد ممنوعہ دہشتگردانہ تنظیم جیش محمد سنگ منسلک تھا۔ یہ دہشت گرد حال ہی مانہہ پاکستان مقبوضہ کشمیر تیں درانداز ہوا تھا۔ آکاشوانی غا نمائندہ غے مطابق یہ دہشت گرد اکھنور آلو رستو اختیار کر غے علاقہ مانہہ کو نے بڑو حادثو کرن غی تاڑ مانہہ تھا۔ اطلاعات غے مطابق یہ دہشت گرد پٹل علاقہ تیں اکھنور مانہہ داخل ہوا اور ان غا قبضہ تیں اک وائرلس سیٹ وی برآمد ہووے جس تیں پتو چلے جے یہ دہشت گرد تنظیم جیش محمد سنگ وابستہ تھا۔ 16 ویں انفنٹری ڈویژن غا جی او سی میجر جنرل سمیر شری واستو نے دسیو ہے جے مذکورہ دہشت گرد اک چھوٹو گروپ اختیار کر غے کو نے بڑو حادثو کرن غی تاڑ مانہہ تھا۔ واضع رہ جے ان دہشت گردان نے سومواریں فوجی کاناوائی ور گولی چلائی تھی جس گا جواب مانہہ فوج تے این ایس جی کمانڈو غا جوانان نے ویلاور کاروائی کر غے ان نانہہ ہلاک کر دتو۔

\*\*\*\*\*

### Air Marshal Leh

انر مارشل پنکج موہن سنہا انر افسر کمانڈینگ ان چیف تے مغربی انر کمانڈر نے اج انر فورس اسٹیشن تھوانیس تے انر فورس سٹیشن لہیہ غو دورو کر غے دیوالی غا موقعہ ور فضائیہ غا جاں بازاں سنگ وقت گزاريو۔ انہاں نے ان غا بے باک جذبہ تے حوصلہ غی سراہنا کی تے تمام اہلکاران تے ان غا کنیاں نانہہ تہوار غی مبارکباد دتی۔ اس موقعہ ور انہاں نے انر فورس سٹیشن تھوانیس مانہہ جدید ترین انر ٹریفک سروسز کمپلیکس غو افتتاح وی کیو جس غی وجہ سنگ آپریشنل تیاریاں نانہہ بدھان مانہہ مدد ملے گی۔

\*\*\*\*\*

### Tawang Rajnath Singh

وزیر دفاع راجناتھ سنگھ نے اج توانگ مانہہ سردار ولہہ بھائی پٹیل غا مجسمہ تے میجر رالینگو باب کیتھینگ عجائب گھر غو عملی طور ور افتتاح کرن غا موقعہ ور اظہار کیو ہے جے بھارت تے چین اصل قبضہ لکیر غا معاملات ور سفارتی تے فوجی سطح ور گل بات کر رہیا ہیں تا نجے یہ رنجش ختم کی جا سکیں۔ انہاں نے کہیو جے توانگ مانہہ موجود سردار ولہہ بھائی پٹیل غو مجسمو عوام مانہہ یکجہتی غی سوچ تے جذبہ نانہہ مزید نکھارے گو۔ انہاں نے کہیو جے ملک مانہہ جامعہ تے مجموعی ترقی تده بی ممکن ہے جد ملک غو شمال مشرقی حصو ترقی کرے گو۔ اور سرکار اس خطہ نانہہ قدرتی ترقی غے نال نال ثقافتی تے معاشی طور ور وی ترقی یافتہ بناوے گی۔ فوج غو ذکر کرتاں واں کہیو جے فوج حفاظت غے نال نال دیگر بہتریاں مانہہ وی عوام سنگ ہتھ بٹا رہی ہے۔ وزیر موصوف نے مذکورہ مجسمہ تے عجائب گھر غو افتتاح 4 کو ر ہیڈ کوارٹر تیز پور آسام تیں ہی براہ راست کیو۔ موسم خراب ہون غی وجہ سنگ وے توانگ نہیں پُچ سکیا۔ اس موقعہ ور گورنر ریٹائرڈ لیفٹننٹ جنرل کے ٹی پرانیک، وزیر اعلیٰ پیما کھانڈو، مرکزی وزیر کرن رجیجو، منی پور غا وزیر اعلیٰ این بارین سنگھ غے علاوہ میجر باب غا کنبہ غا افراد وی موجود تھا۔

\*\*\*\*\*

## India China Sweets

اصل قبضہ لکیر ور تعینات بھارتی فوج تے چینی فوج غا جواناں نے دیوالی غی خوشی مانہہ مٹھائیاں گو تبادلو کیو۔ فوجی ذرائع نے دسیو ہے جے یاہ روایتی رسم مشرقی لداخ غا ڈمچوک تے ڈپسنگ تیں دوہاں مُلکاں غی فوج غا پچھے ہٹن تیں بعد ادا کی گئی۔ اور دسیو گیو ہے جے فوج نے اصل قبضہ لکیر ور وی کئیں جگہیں مٹھائیاں گو تبادلو کیو ہے۔ فوجی ذرائع نے اظہار کیو ہے جے مذکورہ مقامات تیں دوہاں مُلکاں غی فوج مکمل طور ور پچھے ہٹ گئیں ہیں اور مقامی کمان سطح ور گل بات جاری رہ گئی۔

\*\*\*\*\*

یہ خبر تم آکاشوائی جموں تیں سن رہیا ہیں خبراں غا باقی حصہ نال غلام سرور۔

## National Unity Day

اج قومی یکجہتی تہاڑو ہے۔ ہر سال 31 اکتوبر نانہہ مُلک پھر مانہہ سردار ولہہ بھائی پٹیل غی یوم پیدائش غا موقعہ ور یوہ تہاڑو منایو جا نے۔ واضح رہ جے سردار ولہہ بھائی پٹیل بھارت غی آزادی غی جدوجہد مانہہ اک اہم شخصیت تھان، تے مُلک گا پہلا نائب وزیر اعظم تے وزیر داخلہ وی تھان۔ قومی یکجہتی تہاڑو اک جُٹ ہون تے مُلک غا لوکاں مانہہ یکجہتی غا جذبہ نانہہ فروغ دین مانہہ اہم کردار ادا کرے۔ اپنی غیر معمولی قیادت تے قومی یکجہتی نانہہ فروغ دین آلا مشہور سردار ولہہ بھائی پٹیل نانہہ بھارت غا مردِ آبن غا طور ور وی یا دکیو جانے۔

\*\*\*\*\*

## PM Ekta Diwas

وزیر اعظم نریندر مو دی نے گجرات غا ایکتا نگر کیویڈیا مانہہ راشٹریہ ایکتا دیوس منان غا موقعہ ور خطاب کرتاں واں آپسی یکجہتی قائم رکھن غی اہمیت ور زور دتو اور قوم غی سالمیت غے خلاف کھلا ہون آلاں نانہہ خبر داروی کیو۔ انہاں نے کہیو جے آئندہ 25 سالان مانہہ وکست بھارت بنان واسطے آپسی یکجہتی بہت ضروری ہے۔ اور گذشتہ دس سالان مانہہ سرکار نے یکجہتی نانہہ یقینی بنان واسطے کئی اقدامات چایا ہیں۔ اُن گو کہنو تھو جے بھارت عالمی رہنما بنن آلو ہے۔ جہیڑو جے تاریخ مانہہ سنہرا حرفاں مانہہ لکھیو جائے گو۔ مُلکی اتحاد مانہہ سردار پٹیل غا کردار بارے بولتاں واں انہاں نے کہیو جے آئندہ 2 سالان مانہہ اُن غو 150 وں جنم تہاڑو منایو جا نے گو۔ واضح رہ جے اج سویرے ہی وزیر اعظم نے ایکتا نگر مانہہ یکجہتی غا مجسمہ ور پُج غے انہاں نانہہ خراج عقیدت پیش کیو۔ اس تیں بعد انہاں نے موجود عوام نانہہ یکجہتی غو عہد وی کرایو تے ایکتا دیوس پریڈ غو وی معانینو کیو۔ یا درہ جے اس مذکورہ پریڈ مانہہ 9 ریا ستاں تے 1 یونین ٹیرٹیری غا کُل 16 جتھاں نے حصو ليو۔ جن مانہہ این ایس جی، بی ایس ایف، سی آر پی ایف تے سکولی طلباء نے بکھ بکھ قسم گا فنی بٹر غو مظاہرہ کیو۔

\*\*\*\*\*

## PM Diwali

وزیر اعظم نریندر مو دی نے دیوالی غا تہوار ور لوکاں نانہہ میا رکباد دتی ہے اک سماجی میڈیا پوسٹ مانہہ وزیر اعظم نے لوکاں نانہہ خوشحال تے صحت مند رہن غی نیک خواہشات دتیں۔ انہاں نے دُعا کی کہ بھگوان شری گنیش تے ماں لکشمی ہر اک ور اپنو کرم بنانے رکھیں۔

\*\*\*\*\*

## Prez VP Patel

صدر جمہوریہ دروپدی مُرمو تے نائب صدر جگدیپ دھنکر نے اج پٹیل چوک نوی دہلی مانہہ سردار ولہہ بھائی پٹیل غا جنم تہاڑا غا موقعہ ور اُن گا مجسمہ ور پُھل چاڑ غے اُن نانہہ خراج عقیدت پیش کیو۔ صدر جمہوریہ غو کہنو تھو کہ سردار پٹیل اک عظیم شخص تے سرکردہ قوم ساز

تھا۔ نائب صدر جمہوریہ جگدیپ دھنکر نے کہیو کہ سردار پٹیل غونظریو اک مضبوط، آپسی بھائی چارہ، اک جُٹ ہون غی ترغیب دے تھو۔ راشٹریہ ایکتا دیوس ور نائب صدر نے ہر اک ور زور دتو کہ وے سردار ولہ بھائی پٹیل غا نظریہ تے اتحاد نانہہ برقرار رکھن غو عہد کریں۔

\*\*\*\*\*

### Indra Death Anniversiry

قوم اج مُلک غی سابق وزیر اعظم آنجہانی اندرا گاندھی نانہہ اُن غی برسی ور یاد کر رہی ہے۔ اس سلسلہ مانہہ کا نگریس لیڈر اہل گا ندھی نے پارٹی غا دیگر سینئر رہنماواں غے ہمراہ شکتی استہل دہلی پُج غے اُنہاں نانہہ خراج عقیدت پیش کیو۔ اس موقعہ ور اندرا گاندھی یا دگارور اک ثقافتی پروگرام غو انعقاد کیو گیو۔ کانگریس صدر ملک ارجن کھڑگے نے وی اُنہاں نانہہ خراج عقیدت پیش کیو اور سوشل میڈیا پوسٹ کر غے اظہار کیو جے اُنہاں نے مُلکی اتحاد ترقی تے مضبوطی مانہہ اہم کردار ادا کیو ہے۔

\*\*\*\*\*